

ISLAM: FAHAM AGAMA DAN ASAS AKHLAK OLEH SYED MUHAMMAD NAQUIB AL-ATTAS: SUATU ULASAN RINGKAS

Mastura binti Haji Abd Wahabⁱ, Khadijah binti Mudaⁱⁱ & Wan Mohd Fazrul Azdi bin Wan Razaliⁱⁱⁱ

ⁱ Pelajar Sarjana Sains Sosial, Program Generik, Pusat Pengajian Siswazah, Universiti Sains Islam Malaysia. masturawahab02@yahoo.com

ⁱⁱ Pensyarah, Pusat Pengajian Teras & Fakulti Kepimpinan dan Pengurusan. khadijahmuda@usim.edu.my

ⁱⁱⁱ Pengarah, Pusat Pengajian Teras, Universiti Sains Islam Malaysia. wmfazrul@usim.edu.my

Abstrak

Agama merupakan salah satu perkara penting dalam kehidupan manusia. Agama disebut sebagai al-Dīn dalam Bahasa Arab dan religion dalam Bahasa Inggeris. Di Malaysia, Islam merupakan agama rasmi Persekutuan seperti yang termaktub dalam Perkara 3(1) Perlembagaan Persekutuan. Perbincangan mengenai agama Islam sebagai al-Dīn serta asas-asas akhlak dibincangkan dalam sebuah buku karangan Syed Muhammad Naquib Al-Attas, seorang ahli falsafah Malaysia yang terulung. Buku tersebut berjudul Islam: Faham Agama dan Asas Akhlak (2019). Artikel ini menghuraikan secara ringkas biografi Syed Muhammad Naquib Al-Attas, memberi pengenalan ringkas terhadap buku Islam: Faham Agama dan Asas Akhlak serta menghuraikan konsep agama, Islam dan asas-asas akhlak menurut pandangan Syed Muhammad Naquib Al-Attas. Artikel ini menggunakan kaedah kualitatif melalui kajian analisis teks buku Islam: Faham Agama dan Asas Akhlak oleh Syed Muhammad Naquib Al-Attas. Hasil kajian mendapati bahawa buku Islam: Faham Agama dan Asas Akhlak adalah merupakan bab yang ketiga dalam buku Islam and Secularism (1978) karangan Syed Naquib Al-Attas dalam Bahasa Inggeris. Al-Attas berpendapat bahawa agama merujuk kepada al-Dīn yang merangkumi keimanan, kepercayaan, amalan, ajaran dan anutan orang Muslim sama ada dari sudut individu atau masyarakat. Islam pula bermaksud penyerahan diri kepada Allah oleh sekalian makhluk sama ada yang mempunyai akal, hati, nafsu dan kekuatan diri bagi mengabdikan diri kepadaNya (‘ubudiyah) dengan melakukan segala suruhanNya. Manakala, akhlak pula merujuk kepada tingkah laku atau perangai individu. Akhlak merupakan sifat-sifat asasi yang mendasari kehidupan beragama bagi setiap individu yang bergelar Muslim. Oleh itu, buku Islam: Faham Agama dan Asas Akhlak ini boleh dijadikan rujukan kepada para pembaca dalam memahami konsep agama, Islam sebagai al-Dīn serta asas-asas akhlak yang mendasari kehidupan seorang Muslim.

Kata kunci: Syed Muhammad Naquib Al-Attas, Islam: Faham Agama dan Asas Akhlak, Islam, Agama, Akhlak.

PENDAHULUAN

Agama merupakan salah satu perkara penting dalam kehidupan manusia. Agama disebut sebagai *al-Dīn* dalam Bahasa Arab dan *religion* dalam Bahasa Inggeris. Menurut Kamus Dewan (2010), perkataan agama bermaksud kepercayaan pada Tuhan dan sifat-sifat serta kekuasaan Tuhan dan penerimaan ajaran dan perintah-Nya, kepercayaan pada yang Maha Kuasa. Beberapa ahli falsafah Barat memberikan maksud *religion* mengikut konteks atau bidang kepakaran masing-masing. Ada yang mengatakan agama sebagai kepercayaan terhadap makhluk-makhluk spiritual, agama sebagai jalan pertengahan antara magik dan sains, agama sebagai sistem kepercayaan yang berkaitan dengan perkara-perkara yang dianggap suci (*sacred thing*), dan banyak lagi (Tylor, 1874; Frazer, 1890; Durkheim, 1912).

Muhammad ʿAbdullah Darrāz memberikan pengertian *al-Dīn* sebagai kepercayaan terhadap kewujudan zat yang tidak kelihatan atau zat yang paling tinggi, yang mempunyai perasaan dan keinginan, kewibawaan dan kawalan terhadap perkara yang dipentingkan oleh manusia. Kepercayaan ini akan membangkitkan rasa ingin mencari dalam diri manusia bagi mendapatkan perlindungan daripada zat yang paling tinggi ini sama ada dalam kegembiraan, ketakutan, dan sebagainya. Secara ringkas, *al-Dīn* adalah kepercayaan kepada ketuhanan suatu zat, yang melahirkan ketaatan dan peribadatan (Muhammad ʿAbdullāh Darrāz 1990: 51).

Menurut Al-Attas (2019), Islam adalah agama yang benar di sisi Allah dan agama bagi umat Islam yang digelar sebagai Muslim. Menurut Abu Al-ʿĀlā Al-Maudūdī (1985), perkataan Islam bermaksud tunduk dan patuh kepada perintah Allah yang Maha Berkuasa serta meninggalkan segala laranganNya. Istilah akhlak berasal daripada bahasa Arab yang diambil daripada perkataan '*khuluq*' yang boleh didefinisikan sebagai perangai atau tingkah laku, tabiat, kepercayaan, pegangan atau agama. Berdasarkan pengertian ini, akhlak merupakan perangai, tabiat, maruah atau agama yang mempamerkan gambaran atau rupa batin seseorang (Asmawati Suhid & Abdul Rahman Md. Aroff, 2004).


Konsep agama, Islam dan asas akhlak ini dibahaskan dalam buku berjudul *Islam: Faham Agama dan Asas Akhlak* karangan Syed Muhammad Naquib Al-Attas. Al-Attas merupakan salah seorang tokoh falsafah kontemporari Islam yang hebat daripada Nusantara Melayu. Beliau mahir dalam ilmu-ilmu berkaitan metafizik, sastera, teologi, falsafah, agama, sejarah, dan peradaban. Kitab *Islam: Faham Agama dan Asas Akhlak* ini pada mulanya diterbitkan pada tahun 1977 oleh Angkatan Belia Malaysia (ABIM) dan merupakan salah satu bab dalam buku *Islam and Secularism* (1978) karangan beliau dalam

bahasa Inggeris. Keseluruhan buku ini telah diterjemahkan ke dalam pelbagai bahasa, termasuklah Bahasa Melayu dan Indonesia.

Makalah ini ditulis bagi menyimpulkan secara ringkas topik-topik berkaitan agama Islam dan asas akhlak seperti yang termaktub dalam buku *Islam: Faham Agama dan Asas Akhlak*. Di samping itu, penulis juga akan menyatakan secara ringkas biografi Syed Muhammad Naquib Al-Attas serta mesej-mesej utama berkaitan agama, Islam dan asas akhlak yang terdapat dalam buku *Islam: Faham Agama dan Asas Akhlak*. Topik berkaitan Islam ini termasuk dalam kajian Sarjana penulis iaitu Islam sebagai agama Persekutuan Malaysia.

Pada 15 Februari 2019, penulis juga berkesempatan menghadiri *International Symposium On Syed Muhammad Naquib Al-Attas: Philosophical and Civilizational Dimensions* di Universiti Teknologi Malaysia, Kuala Lumpur. Penulis amat kagum dengan isi kandungan ucapan Syed Muhammad Naquib Al-Attas berkenaan maksud Islam, asal usul perkataan Islam, maksud agama, *al-Dīn* dan *al-millah*, konsep ketuhanan (*ilāhiyyāt*) dan kerasulan (*al-Nubuwwāt*). Ucapannya itu mengajak manusia berfikir aras tinggi bagi mengenal hakikat ketuhanan yang Esa dan maksud Islam yang sebenar, melangkaui apa yang terbatas dalam konteks perlembagaan dan penelitian ilmu sains sosial.

BIOGRAFI RINGKAS SYED MUHAMMAD NAQUIB AL-ATTAS



Nama penuh Al-Attas ialah Syed Muhammad Naquib bin Ali bin Abdullah bin Muhsin bin Muhammad Al-Attas. Beliau dilahirkan pada 5 September 1931 di Bogor, Jawa Barat. Istilah sayyid atau syed digunakan pada namanya untuk menandakan keturunan Husaynid. Ini berlaku kepada Al-Attas kerana salasilahnya dapat dikesan melalui sayyid-sayyid 'Alawi di Hadramaut yang salasilahnya kembali kepada Imam Hussein, cucu Nabi Muhammad (Wan Mohd Nor Wan Daud, 1998: 1).

Syed Muhammad Naquib Al-Attas mendapat pendidikan awal di Indonesia dan Malaysia. Pada usia lima tahun, beliau didaftarkan di Sekolah Rendah Ngee Heng di Johore untuk pendidikan rendahnya dari tahun 1936 hingga 1941. Setelah selesai pendidikan tahap rendah, Syed Muhammad Naquib Al-Attas melanjutkan pelajarannya dalam bahasa Arab di Madrasah Al-Urwat Al-Wuthqa di Sukabumi, Jawa Barat dari tahun 1941 hingga 1945. Pada usia lima belas tahun, Syed Muhammad Naquib Al-Attas kembali ke Johor lagi untuk melanjutkan pelajarannya iaitu pertamanya di sekolah Bukit Zahran dan kemudian di English College (1946 - 1951)

(Irma Novayani, 2017: 76-77). Kemudian, beliau memasuki latihan ketenteraan di akademi tentera selepas sekolah menengah pada tahun 1951 di Eton Hall, Chester, Wales, di Royal Military Academy, Sandhurst, England (1952-1955). Pada masa inilah minat Syed Muhammad Naquib Al-Attas dengan kesusasteraan Melayu mulai berkembang. Hal ini kerana beliau tinggal dengan salah seorang bapa saudaranya, Ungku Abdul Aziz Bin Ungku Abdul Majid, yang memiliki perpustakaan manuskrip Melayu yang unik, terutamanya dalam topik kesusasteraan dan sejarah Melayu.

Syed Muhammad Naquib Al-Attas telah menulis dua buah buku ketika masih menjadi pelajar Sarjana Muda di Universiti Malaya. Buku pertamanya adalah *Rangkaian Ruba'iyat* pada tahun 1959 dan buku keduanya adalah *Beberapa Aspek Tasawuf Seperti Yang Difahami dan Diamalkan di Kalangan Orang Melayu*, 1963. Kemudian, beliau selesai menyambung pelajaran di peringkat Sarjana di Universiti McGill, Montreal, Quebec, Kanada dalam bidang pengajian Falsafah Islam pada tahun 1962. Tajuk tesis beliau adalah *Raniri and the Wujudiyah of 17th Century Aceh*. Selepas itu, beliau menyambung pelajarannya di peringkat Doktor Falsafah di School of Oriental and African Studies, Universiti London. Beliau menghasilkan tesis doktoral bertajuk *The mysticism of Hamzah Fansuri* pada tahun 1962 di bawah seliaan Profesor A. J. Arberry dan Dr Martin Lings (Aris Widodo, 2009).

Walaupun dilahirkan di Indonesia, Syed Muhammad Naquib Al-Attas menghabiskan kehidupan akademik dan pekerjaannya di Malaysia. Beliau memulakan kerjaya akademik pertamanya ketika dilantik sebagai pensyarah, seterusnya sebagai pensyarah kanan dalam Kesusasteraan Islam Melayu klasik di Universiti Malaya dari tahun 1964 sehingga tahun 1969. Syed Muhammad Naquib Al-Attas seterusnya dilantik menjadi Ketua Bahagian Sastera di Jabatan Pengajian Melayu di universiti tersebut pada tahun 1968 dan menjadi Dekan Fakulti Kesenian dari tahun 1969 sehingga tahun 1970. Pada tahun 1970, beliau merupakan salah seorang pengasas Universiti Kebangsaan Malaysia. Dari tahun 1987 hingga 2003, beliau dilantik sebagai Pengarah International Institute of Islamic Thought and Civilization (ISTAC), Malaysia (Wan Mohd Nor Wan Daud, 1998; Aris Widodo, 2009).

Guru-guru beliau dari kalangan Orientalis dan sarjana Jepun yang terkenal adalah seperti Sir Hamilton Gibb dari England dan Toshishiko Izutsu dari Jepun. Beliau juga telah bekerja dengan ramai Orientalis terkemuka seperti A. J. Arberry, Richard Winstedt dan Martin Lings ketika berada di Pusat Pengajian Oriental dan Afrika, Universiti London. (Wan Mohd Nor Wan Daud, 1998; Aris Widodo, 2009). Syed Muhammad Naquib Al-Attas telah menulis puluhan buah buku dan monograf, mengenai Islam yang berkaitan dengan metafizik, sastera, teologi, falsafah, agama, sejarah, dan peradaban dan lebih daripada empat ratus artikel. Buku-bukunya juga telah diterjemahkan kepada

bahasa lain seperti Bahasa Arab, Indonesia, Parsi, Turki, Urdu, Malayalam, Perancis, Jerman, dan sebagainya. Antara buku-buku yang ditulis oleh beliau adalah seperti berikut:

- 1) *Preliminary Statement On A General Theory of The Islamization of The Malay-Indonesian Archipelago* (1969)
- 2) *The Mysticism of Hamzah Fansuri* (1970)
- 3) *Islam dalam Sejarah dan Kebudayaan Melayu* (1972)
- 4) *Islam and Secularism* (1978)
- 5) *Prolegomena to the Metaphysics of Islam* (1995)
- 6) *Aims and Objectives of Islamic Education* (1996)
- 7) *Concept of Education in Islam* (1997)
- 8) *Islam and the Philosophy of Science* (1997)
- 9) *The Meaning and Experience of Happiness in Islam* (1997)
- 10) *The Oldest Known Malay Manuscript: A 16th Century Malay Translation of the 'Aqā'id of Al-Nasāfi* (1998)
- 11) *Risalah Untuk Kaum Muslimin* (2001)



METODOLOGI KAJIAN

Metodologi yang digunakan dalam artikel ini adalah kajian analisis teks *Islam: Faham Agama dan Asas Akhlak* berkaitan konsep agama, Islam, dan asas akhlak yang diutarakan oleh Syed Muhammad Naquib Al-Attas. Selain itu, kajian ini juga mengambil rujukan sampingan daripada buku-buku dan artikel jurnal yang berkaitan dengan konsep agama, Islam dan akhlak serta riwayat hidup Al-Attas. Topik-topik yang diberi penekanan dalam buku *Islam: Faham Agama dan Asas Akhlak* adalah berkaitan maksud agama dari segi bahasa dan istilah; maksud *al-Dīn* dan faham *al-Dīn*; maksud Islam dari sudut bahasa dan istilah; serta sifat-sifat asasi atau asas akhlak bagi Islam.

PENGENALAN RINGKAS KEPADA BUKU *ISLAM: FAHAM AGAMA DAN ASAS AKHLAK*

Buku *Islam: Faham Agama dan Asas Akhlak* adalah merupakan bab yang ketiga dalam buku *Islam and Secularism* (1978) karangan Al-Attas dalam Bahasa Inggeris. Buku *Islam: Faham Agama dan Asas Akhlak* ini mengandungi seratus halaman. Pertama kalinya buku ini telah diterbitkan oleh Angkatan Belia Islam Malaysia (ABIM) pada tahun 1977. Buku ini telah diterbitkan buat kali kedua oleh Islamic Banking & Finance Institute Malaysia (IBFIM)

pada tahun 2013. Kemudian, dengan sedikit penambahbaikan, buku ini telah diterbitkan pada tahun 2019 oleh Ta'dib International Sdn Bhd yang bertempat di Kuala Lumpur.

Melalui penelitian terhadap kandungan buku ini, secara keseluruhannya buku *Islam: Faham Agama dan Asas Akhlak* yang ditulis Syed Muhammad Naquib Al-Attas ini mengandungi topik-topik berkenaan akidah iaitu mengenai agama dan Islam serta perbahasan mengenai tasawwuf iaitu asas akhlak. Turut terdapat dalam huraian buku ini adalah perbahasan mengenai epistemologi ilmu serta sifat-sifat insaniah, dan perhambaan kepada Allah (*'ubudiyah*). Bagi menguatkan hujah-hujah beliau dalam buku ini, beliau membuat huraian ringkas bagi konsep-konsep yang disebutkan di atas dengan *shawāhid* atau bukti-bukti daripada ayat-ayat Quran, hadis-hadis Rasulullah saw, serta perumpamaan Arab.

KONSEP AGAMA, ISLAM DAN AKHLAK MENURUT SYED MUHAMMAD NAQUIB AL-ATTAS DI DALAM BUKU *ISLAM: FAHAM AGAMA DAN ASAS AKHLAK*

Seperti mana yang telah dijelaskan sebelum ini, terdapat tiga konsep utama yang dibahaskan oleh Syed Muhammad Naquib Al-Attas di dalam buku *Islam: Faham Agama dan Asas Akhlak*. Tiga konsep utama yang perlu difahami secara jelas oleh setiap insan adalah seperti berikut:

1) Agama

Menurut Syed Muhammad Naquib Al-Attas, memahami agama di sini merujuk kepada kefahaman terhadap konsep *al-Dīn*. Konsep *al-Dīn* dalam Islam berbeza dengan konsep *religion* dari Barat. Terdapat empat maksud *al-Dīn* yang telah dirumuskan oleh Syed Muhammad Naquib Al-Attas iaitu keadaan berhutang, keadaan menyerah diri, kuasa dan daya memberi hukuman, penilaian dan pertimbangan serta perkara yang membawa kecenderungan kepada diri setiap manusia atau sesuatu kebiasaan yang menjadi adat resam dalam hidup manusia. Secara ringkasnya, pengertian yang terakhir bermaksud *al-Dīn* merangkumi keimanan, kepercayaan, amalan, ajaran dan anutan orang Muslim sama ada dari sudut individu atau masyarakat yang bergabung membentuk sebuah agama yang dinamakan Islam (Syed Muhammad Naquib Al-Attas, 2019: 3-5).

Faham *al-Dīn* bermaksud suatu gaya atau cara berkelakuan atau perangai setiap insan yang selari, sehati dan sepakat mengikut undang-undang yang adil serta adab dan tatasusila masyarakat yang luhur dan baik budi pekertinya. Secara ringkasnya, kefahaman terhadap agama ini membawa kepada amalan baik yang berterusan dalam diri manusia yang diperhalusi dengan adab atau akhlak yang terpuji sehingga menjadi

kebiasaannya atau tabiat dalam tata cara hidup seseorang insan yang bergelar Muslim. Kefahaman yang jelas terhadap konsep agama atau *al-Dīn* akan membentuk sesebuah *tamaddun* Islam yang agung, di mana keadaan kehidupan Muslim yang bermasyarakat itu sudah mencapai taraf kehalusan tatasusila dan kebudayaan yang luhur bagi seluruh masyarakatnya (Syed Muhammad Naquib Al-Attas, 2019: 7-9).

2) Islam

Syed Muhammad Naquib Al-Attas menyatakan bahawa maksud Islam itu itu adalah hasil gabungan maksud *al-Dīn* dan *aslama*. Seperti yang disebutkan pada subtopik sebelum ini, kalimah *al-Dīn* bererti gaya atau tatacara hidup yang luhur dalam kehidupan manusia. *Al-Dīn* secara hakikinya juga merujuk kepada agama Islam kerana satu-satunya agama yang diterima di sisi Allah swt adalah agama Islam. Perkataan *aslama* pula bererti menyerah diri. Dalam Islam, penyerahan diri bermaksud penyerahan yang tulus ikhlas dan disedari serta diredhai dan yang dilakukan secara habis-habisan kepada Allah swt. Tambahan pula, penyerahan diri ini juga perlu dilakukan secara sukarela tanpa apa-apa paksaan serta patuh terhadap perintah Allah swt (Syed Muhammad Naquib Al-Attas, 2019: 25). Firman Allah dalam surah al-Baqarah:

كِرَافِي الْيِنَقَ تَلِيَانِ الْرِشْدُ مَنْ الْغَيْفَ مَنْ يَلْفُ رَبَّالَطُغُوتِ وَيُؤْمِنُ بِاللْفَقْدِ لَبْتِ مَنْ كَ
بَلْغُزُوةَ الْوَقَى فَهِنَ اَمَلَاةَا وَاللُّسَ يِيْعُ ثِيْمُ ٢٥٦

Maksudnya: Tidak ada paksaan dalam agama (Islam), kerana sesungguhnya telah nyata kebenaran (Islam) dari kesesatan (kufur). Oleh itu, sesiapa yang tidak percayakan Taghut, dan ia pula beriman kepada Allah, maka sesungguhnya ia telah berpegang kepada simpulan (tali agama) yang teguh yang tidak akan putus. Dan (ingatlah), Allah Maha Mendengar, lagi Maha Mengetahui.⁹² [Al Baqarah:256]

Ayat di atas menjelaskan bahawa Allah tidak sesekali memaksa hamba-hambaNya untuk beriman kepadaNya. Tetapi, agama yang hak iaitu yang benar dan diterima di sisi Allah swt satu-satunya adalah agama Islam. Orang yang beragama selain daripada Islam dianggap kufur atau kafir, yakni sesat. Maka, sesiapa sahaja yang tidak mensyirikkan Allah tergolong dalam kalangan hamba-hambaNya yang beriman dengan teguh tanpa berpaling dariNya dan daripada agama Islam. Allah juga Maha mendengar dan Maha Mengetahui setiap sesuatu yang nyata mahupun yang tersembunyi.

⁹² Al-Quran. al-Baqarah 2:256. (Semua terjemahan Al-Quran dalam penulisan ini berdasarkan Terjemahan Saheeh International. 2010. *The Qur'ān With Sūrah Introductions and Appendices*. Birmingham: Maktabah Book Sellers and Publishers Terjemahan dari sumber lain akan disebutkan dengan sewajarnya)

Oleh itu, hasil daripada gabungan maksud *al-Dīn* dan *aslama*, Islam bermaksud penyerahan diri oleh sesuatu yang bersifat haywani (rendah) seperti manusia dan makhluk-makhluk Allah yang lain sama ada yang mempunyai akal, hati, nafsu dan kekuatan diri bagi mengabdikan diri kepadaNya (*‘ubudiyah*) dengan melakukan segala suruhanNya (Syed Muhammad Naquib Al-Attas, 2019: 37). Maksud Islam ini bertepatan dengan hadis Rasulullah swt (dikenali juga sebagai hadis Jibril) terhadap maksud Islam, iaitu: “Kamu bersaksi (*bershahādah*) bahawa tiada ilāh (tuhan) selain Allah dan bahawasanya Muhammad itu adalah Rasul (pesuruh) Allah, dan hendaklah kamu mendirikan solat, mengeluarkan zakat, berpuasa di bulan Ramadan dan menunaikan haji ke Baitullah jika kamu mampu mengerjakannya” (H.R Al- Bukhari, 1987:50; Muslim, t.t:9).

3) Asas Akhlak

Syed Muhammad Naquib Al-Attas menyatakan bahawa sifat-sifat asasi (asas-asas akhlak) ini menjadi asas kepada faham diri dan faham insan (manusia) dalam Islam. Sifat-sifat ini menjadi dasar kehidupan beragama bagi setiap individu yang bergelar Muslim. Antara sifat-sifat yang menjadi asas kehidupan Islamiah, yakni kehidupan yang berakhlak adalah seperti berikut:

- i) Faham kebebasan dan tugas serta tanggungjawab;
- ii) Faham ilmu;
- iii) Faham keihlanan;
- iv) Budi pekerti yang luhur dan sempurna;
- v) Faham ukhuwah;
- vi) Persaudaraan diri yang Islam;
- vii) Faham peranan dan kelakuan serta perangai diri seseorang dan masyarakat;
- viii) Daya sifat yang saling membantu antara satu sama lain sehingga membentuk kesatuan diri dalam kehidupan bermasyarakat di sesebuah negara (Syed Muhammad Naquib Al-Attas, 2019: 73).

KESIMPULAN

Agama merupakan salah satu *uṣūl* atau perkara penting dalam kehidupan manusia. Agama disebut sebagai *al-Dīn* dalam Bahasa Arab dan *religion* dalam Bahasa Inggeris. Walaupun kalimat *al-Dīn* secara literalnya bermaksud agama, namun hakikatnya *al-Dīn* merujuk kepada agama Islam kerana Islam adalah satu-satunya agama yang diterima di sisi Allah swt. Di Malaysia, Islam merupakan agama rasmi Persekutuan seperti yang termaktub dalam Perkara 3(1) Perlembagaan Persekutuan. Perbincangan mengenai agama, Islam sebagai *al-Dīn* serta asas-asas akhlak dibincangkan dalam sebuah buku karangan Syed Muhammad Naquib Al-Attas yang bertajuk *Islam: Faham Agama dan Asas Akhlak*.

Syed Muhammad Naquib Al-Attas merupakan seorang ahli falsafah dan pemikir yang terulung dari Malaysia. Beliau merupakan keturunan Nabi Muhammad saw yang ke-37 mengikut susur galur keluarganya. Beliau telah menulis lebih daripada tiga puluh buah buku dan monograf, mengenai Islam yang berkaitan dengan metafizik, sastera, teologi, falsafah, agama, sejarah, dan peradaban dan lebih daripada empat ratus artikel. Buku-bukunya juga telah diterjemahkan kepada bahasa lain seperti Bahasa Arab, Indonesia, Parsi, Turki, Urdu, Malayalam, Perancis, Jerman, dan sebagainya.

Buku *Islam: Faham Agama dan Asas Akhlak* ini mengandungi topik-topik berkenaan akidah iaitu mengenai kefahaman terhadap konsep agama dan Islam serta perbincangan mengenai asas-asas akhlak. Diselitkan juga perbincangan mengenai konsep ilmu menurut pandangan Al-Attas tersendiri.

Konsep kefahaman terhadap agama merujuk kepada *al-Dīn* yang merangkumi keimanan, kepercayaan, amalan, ajaran dan anutan orang Muslim sama ada dari sudut individu atau masyarakat. Islam pula bermaksud penyerahan diri kepada Allah oleh sekalian makhlukNya sama ada yang mempunyai akal, hati, nafsu dan kekuatan diri bagi mengabdikan diri kepadaNya (*‘ubudiyyah*) dengan melakukan segala suruhanNya. Manakala, sifat-sifat asasi atau asas akhlak menjadi dasar kehidupan beragama bagi setiap individu yang bergelar Muslim. Kefahaman yang jelas dan betul mengenai konsep agama, Islam dan asas-asas akhlak ini dapat membantu masyarakat memahami keluhuran Islam yang menjadi agama rasmi bagi Persekutuan Malaysia.

RUJUKAN

Al-Quran.

Aris Widodo. 2009. *Syed Muhammad Naquib Al-Attas's Semantic Reading of Islam as Al-Dīn*. Jurnal Al-Jāmi'ah. Vol. 47, No. 1. Indonesia: Pusat Penyelidikan Negeri Sunan Kalijaga Universiti Islam Yogyakarta.

Asmawati Suhid. 2009. *Pendidikan Akhlak dan Adab Islam*. Kuala Lumpur: Utusan Publications & Distributors Sdn Bhd.

Al-Bukhari. 1987. *Sahīh Al-Bukhārī*. Beirut: Dār Ibn Kathīr.

Tylor, Edward Burnett. 1874. *Primitive Culture: Researches into the Development of Mythology, Philosophy, Religion, Language, Art and Custom*. Vol.2. Universiti California: Estes and Lauriat.

- Durkheim, Emile. 2008. *The Elementary Forms of the Religious Life: A Study in Religious Sociology*. Oxford: Oxford University Press.
- Irma Novayani. 2017. *Islamisasi Ilmu Pengetahuan Menurut Pandangan Syed Naquib Al Attas dan Implikasi Tahap Lembaga Pendidikan International Institute Of Islamic Thought Civilization (ISTAC)*. Jurnal Muta'aliyah. Vol. 1. No.1. STA Darul Kamal NW Kembang Kerang Lombok Timur: Etika Publikasi.
- Frazer, James George. 2002. *The Golden Bough*. n.p.p. Dover Publication.
- Kamus Dewan Edisi Keempat* (2010). Terbitan Dewan Bahasa dan Pustaka.
- Muhammad ʿAbdullāh Darrāz. 1990. *Al-Dīn: Buhūth Mumahhadah Li Dirāsah Tārīkh al-Adyān*. Kuwait: Dar al-Qalam.
- Muslim. n.d. *Saḥīḥ Muslim*. Beirut: Dār Ihya' Al-Thurāth Al-cArabiy.
- Saheeh International Translation. 2010. *The Qur'ān With Sūrah Introductions and Appendices*. Birmingham: Maktabah Book Sellers and Publishers.
- Syed Muhammad Naquib Al-Attas. 1978. *Islam and Secularism*. Kuala Lumpur: International Institute of Islamic Thought and Civilization (ISTAC).
- Syed Muhammad Naquib Al-Attas. 1985. *Islam, Secularism and the Philosophy of Future*. London: Mansell Publishing Limited.
- Syed Muhammad Naquib Al-Attas. 1995. *Prolegomena to the Metaphysics of Islam*. Kuala Lumpur: International Institute of Islamic Thought and Civilization (ISTAC).
- Syed Muhammad Naquib Al-Attas. 2001. *Risalah Untuk Kaum Muslimin*. Kuala Lumpur: International Institute of Islamic Thought and Civilization (ISTAC).
- Syed Muhammad Naquib Al-Attas. 2019. *Islam: Faham Agama dan Asas Akhlak*. Kuala Lumpur: Ta'dib International.
- Wan Mohd Nor Wan Daud. 1998. *The Educational Philosophy and Practice of Syed Muhammad Naquib AlAttas, An Exposition of the Original Concept of Islamization*. Kuala Lumpur: ISTAC.